

U ovom broju, između ostalog, čitajte:

- **Premijer i federalni ministri sa predstavnicima UPFBiH**
- **Zastupnik njemačkog Bundestaga u posjeti Udruženju poslodavaca u FBiH**
- **Predstavnici UPFBiH sa delegacijom Misije MMF-a**
- **Premijer Vlade FBiH dao punu podršku realnim zahtjevima poslodavaca**
- **Direktor UPFBiH, ministar rada i socijalne politike FBiH i predstavnici sindikata o Zakonu o štrajku**
- **Održan sastanak Ekonomskog i Pravnog savjeta**
- **Fokus grupe UPFBiH o Zakonu o porezu na dohodak i Zakonu o doprinosima**
- **UPFBiH resornim ministarstvima dostavilo usaglašene prioritetne aktivnosti za poboljšanje poslovnog ambijenta**



UPFBiH: Čestitka novoj Vladi FBiH na imenovanju uz poziv na partnerstvo i saradnju u rješavanju ekonomskih problema

Istaknuto je očekivanje da će saradnja biti unaprijeđena i kroz jačanje socijalnog dijaloga



Udruženje poslodavaca u Federaciji Bosne i Hercegovine uputilo je čestitku novoimenovanom premijeru Federacije BiH Nerminu Nikšiću i članovima novoizabrane Vlade FBiH.

„Uvjereni smo da ćete svojim radom doprinijeti jačanju ekonomskog i društvenog prosperiteta FBiH i uspješno odgovoriti svim izazovima koji su pred vama“, navodi se, između ostalog, u čestitci UPFBiH.

UPFBiH kao reprezentativno udruženje sa oko 22.000 članica, privrednih društava iz FBiH, u svome radu je snažno oslonjeno na aktivnosti Vlade FBiH te izražava nadu i očekivanje da će kroz partnerski odnos i zajedničku saradnju, raditi na poboljšanju poslovnog ambijenta, ekonomskog razvoja i unapređenju standarda radnika i svih građana u FBiH.

U čestitci je, također, istaknuto očekivanje da će saradnja biti unaprijeđena i kroz jačanje socijalnog dijaloga te je naglašena potreba što hitnije uspostave Ekonomsko socijalnog vijeća za teritoriju FBiH, kako bi se kroz saradnju i doprinos vlasti, sindikata i poslodavaca, udruženim snagama i konkretnim rješenjima ojačala bh. ekonomija.

Iz UPFBiH su, također, zatražili što skoriji sastanak sa novoimenovanim premijerom Nikšićem i članovima Vlade FBiH, kako bi se ubrzano krenulo u realizaciju aktivnosti koje će doprinijeti unapređenju poslovnog ambijenta i nagomilanih problema u privredi FBiH.

Premijer i federalni ministri sa Udruženjem poslodavaca u Federaciji BiH

Poslodavci su prezentirali aktivnosti i ideje ovog Udruženja koje imaju za cilj poboljšanje poslovnog ambijenta, rasterećenja privrede i unaprjeđenja uslova za ekonomske reforme i razvoj u FBiH



Premijer Federacije BiH Nermin Nikšić susreo se 11. maja 2023. godine u sjedištu Vlade Federacije BiH u Sarajevu s predstavnicima Udruženja poslodavaca u Federaciji Bosne i Hercegovine. Na sastanku, kojem su prisustvovali i dopremijer i federalni ministar finansija Toni Kraljević, te ministar energije, rudarstva i industrije Vedran Lakić i ministar rada i socijalne politike Adnan Delić, delegacija poslodavaca je čestitala premijeru i ministrima na imenovanju i poželjela uspjeh u budućem radu. Delegaciju poslodavaca činili su predsjednik Adnan Smalbegović, direktor Mario Nenadić, te članovi Petar Čorluka, Behrija Huseinbegović, Safudin Čengić i Rijad Hasić.

Poslodavci su prezentirali aktivnosti i ideje ovog Udruženja koje imaju za cilj poboljšanje poslovnog ambijenta, rasterećenja privrede i unaprjeđenja uslova za ekonomske reforme i razvoj u Federaciji BiH. U tom kontekstu, naglasili su da očekuju podršku premijera i Vlade Federacije BiH.

Istakli su ključne probleme u funkcionisanju poslovne zajednice u FBiH i naglasili posebno

važna interesa poslodavaca i radnika, odnosno, uređenje tržišta rada i rasterećenje cijene rada. Poslodavci očekuju što skoriji početak rada Ekonomsko-socijalnog vijeća i ubrzanje reformi u oblasti rada, rasterećenja cijene rada kroz smanjenje doprinosa i poreza, direktnih i indirektnih poreza, kao i uređenje sistema u cilju unapređenja zapošljavanja, zaustavljanja negativnog trenda odlaska radnika, razvoja privrede i povećanje životnog standarda.



Poslodavci su dostavili premijeru i članovima Vlade pregled ključnih, neophodnih, reformi zakonodavstva i prioriternih aktivnosti.



Premijer Nikšić je naglasio izuzetnu važnost partnerstva Federalne vlade i poslodavaca. Predstavnik Udruženja je upoznao s prioritetima i planiranim reformama Vlade Federaciji BiH u ekonomskoj sferi, istakavši da je opredjeljenje Vlade kreiranje ambijenta za donošenje odluka koje će dugoročno imati pozitivan efekt kako na poslodavce, tako i na radnike. U

tom pravcu, i poslodavci i radnici, naglasio je Nikšić, imaju neupitnog partnera u Federalnoj vladi.

Na sastanku je razgovarano i o organizovanju šireg skupa na kojem će Udruženje poslodavaca detaljnije upoznati premijera i Vladu FBiH s potrebama poslodavaca i nužnim reformama, među kojima su, kako su istakli, rasterećenje rada i uređenje tržišta rada, kao prioritarna pitanja. Sastanak je organizovan u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH – EISE projekat" koji provodi UPFBiH i Unija poslodavaca RS, a koji finansira Europska unija.



Premijer Vlade FBiH dao punu podršku realnim zahtjevima poslodavaca

Poslodavci očekuju brže i odlučnije mjere u pogledu strateških odluka i izmjene propisa i generalno olakšavanju uslova za poslovanje u FBiH

Predstavnici Grupacije poslodavaca Tuzlanskog kantona pri UPFBiH u saradnji sa predstavnicima krovnog Udruženja poslodavaca u Federaciji Bosne i Hercegovine sastali su se u Gradačcu u kompaniji TMD Group s premijerom Vlade Federacije BiH Nerminom Nikšićem i ministrom energetike, rudarstva i industrije FBiH Vedranom Lakićem. Sastanku je prisustvovao predsjednik Grupacije Adem Hanić i direktor UPFBiH Mario Nenadić.

Tom prilikom delegacija Vlade posjetila je postrojenja kompanije TMD Group i upoznala se sa poslovanjem kompanije ali i sa generalnim uslovima funkcionisanja privrede i prioritetima u funkcionisanju poslovne zajednice u FBiH.

Poslodavci su još jednom skrenuli pažnju na potrebu hitnog donošenja propisa iz oblasti poreza na dohodak, doprinosa, poreza no dobit te i pitanjima Zakona o posredovanju u zapošljavanju, zdravstvenom osiguranju, inspekcijama, prekršajima i drugo.



Poslodavci očekuju brže i odlučnije mjere u pogledu strateških odluka i izmjene propisa i

generalno olakšavanju uslova za poslovanje u FBiH.

Očekuje se smanjenje fiskalnih i parafiskalnih opterećenja u što kraćem roku, veća ulaganja u privredu i zajedničko kreiranje prioriternih projekata podrške zapošljavanju nezaposlenih osoba. Poseban problem poslodavci vide u sve većem nedostatku radne snage.



Premijer Vlade FBiH istakao je svoju podršku realnim zahtjevima poslodavaca te upoznao prisutne da Vlada Federacije BiH i svaki od resora u Vladi razmatra dostavljene prijedloge poslodavaca, a posebno paket prioriteta iz oblasti fiskalne reforme, zdravstvenog osiguranja, posredovanja u zapošljavanju i drugo.

Učesnici sastanka saglasni su da neka od spomenutih pitanja sigurno trebaju biti riješena do godišnjih odmora, a posebno prijedlog UPFBiH koji se odnosi na ukidanje, odnosno smanjenje doprinosa i poreza na dohodak za isplaćena povećanja plaća do 400 KM u odnosu na prosječnu plaću radnika s kraja 2022. godine.

Premijer je pokazao spremnost da se svakodnevno radi na pripremi spomenutih i drugih pitanja te da će Vlada i resorna ministarstva učiniti sve da do toga dođe u što skorijem periodu.

Predstavnici UPFBiH sa delegacijom Misije Međunarodnog monetarnog fonda



Predstavnici Udruženja poslodavaca u Federaciji Bosne i Hercegovine i delegacija Misije Međunarodnog monetarnog fonda održali su 19. maja 2023. godine sastanaka na kome su, između ostalog, razgovarali o ekonomskoj situaciji u FBiH, cijenama energenata i hrane, odnosno inflatornim trendovima, utjecaju povećanja cijena električne energije, tržištu rada i poslovnom okruženju, digitalizaciji i zelenoj ekonomiji.

Sastanku su prisustvovali šefica Misije MMF-a Alina Iancu te ostali članovi Misije, te ispred Udruženja predsjednik i direktor Adnan Smilbegović i Mario Nenadić te član UPFBiH Rijad Hasić iz kompanije TMD Group.

Poslodavci su informisali delegaciju o ključnim problemima funkcionisanja realnog sektora i ukazali na više nego sporo rješavanju fiskalnih i parafiskalnih opterećenja, posebno ne donošenja Zakona o doprinosima i Zakona o porezu na dohodak kao i o problemima koje takva situacija ostavlja na tržištu rada u FBiH.

Ključna posljedica nerješavanja ovih pitanja je odlazak radne snage i nedostatak radne snage generalno. Neto primanja radnika su niska dok su bruto davanja na teret poslodavaca previsoka. Ova situacija stvara nekonkurentan položaj domaćih privrednika i na izvoznom tržištu, a dugoročno Federacija ostaje bez radne snage. Poslodavci su također ukazali u izostanak ekonomsko-socijalnog dijaloga te da su brojne teme za koje poslodavci očekuju brže rješavanje. Posebno je ukazano na težak položaj malih i srednjih poduzeća i spor proces liberalizacije uvoza radne snage, a u konačni neizbalansiran odnos politike i propisa kada se radi o odnosu privatnog i javnog sektora.



Poslodavci su također ukazali na potrebu podrške kod podizanja tehnološkog nivoa kompanija i podrške vlasti ulaganja u privredu i očekivane reforme.

Predstavnici MMF-a su se složili sa ocjenama predstavnika UPFBiH i delegirali kao važnu temu pitanje zelene energije i obnovljivih izvora energije. Zaključeno je da je potrebno ubrzati reforme te donijeti strategije i propise kojima bi se u uredila ova pitanja u što skorijem periodu.

Zastupnik njemačkog Bundestaga u posjeti Udruženju poslodavaca u FBiH

**Razgovarano o pitanjima rada, socijalne i porodične politike, kao i
socijalnom dijalogu i minimalnoj plaći**



Direktor Udruženja poslodavaca u FBiH Mario Nenadić i član UPFBiH Muhamed Žero održali su 16. maja 2023. godine sastanak sa zastupnikom u njemačkom Parlamentu i članom Odbora za rad i socijalnu politiku Bundestaga Maxom Straubingerom i rukovodiocem Ekonomskog odjela Ambasade SR Njemačke u BiH Danielom Stinskyem. Sastanku je prisustvovala i sekretar UPFBiH Mersiha Jusić.

Na sastanku je razgovarano o pitanjima rada, socijalne i porodične politike, kao i socijalnom dijalogu i minimalnoj plaći.

Predstavnici UPFBiH upoznali su goste o trenutnoj situaciji iz oblasti rada, zapošljavanja i socijalnih prilika u FBiH kao i o velikom opterećenju cijene rada kroz fiskalne i parafiskalne namete, a što u konačnici dovodi u pitanje konkurentnost kompanija, razvija crno tržište i generalno stvara štetne posljedice na socijalnu sliku u FBiH. Poslodavci su zatražili podršku Ambasade i vlasti Njemačke da podrže interese radnika i poslodavaca i prenese vlastima iskustva iz privrede drugih zemalja a s ciljem uređenja pitanja cijene rada u FBiH.

Direktor UPFBiH, ministar rada i socijalne politike FBiH i predstavnici sindikata o Zakonu o štrajku



Direktor Udruženja poslodavaca u FBiH Mario Nenadić i predstavnici sindikata u FBiH održali su 12. maja 2023. godine sastanak sa federalnim ministrom rada i socijalne politike Adnanom Delićem.

Na sastanku je razgovarano o Zakonu o štrajku koji je u periodu od 2016. godine do danas u nekoliko navrata puštan u proceduru, ali nikad nije donesen. Proteklih godina prošao je čitanje na oba doma Parlamenta FBiH, a nakon toga i javnu raspravu.

Osim o Zakonu, razgovaralo se i o modelima buduće saradnje između Ministarstva i ovih organizacija.

Ministar Delić istakao je tokom sastanaka da će biti predstavnik svima koji su dijelom nadležnosti Ministarstva, pa i sindikatima i Udruženju poslodavaca, ali da očekuje korektnu saradnju zasnovanu na realnim zahtjevima i kompromisima.

"Svjestan sam da se nećemo u svemu moći dogovoriti, da će uvijek biti tema za koje nećemo imati zajednički stav, ali ako želimo da radimo onda ćemo se morati nalaziti na sredini puta, na kompromisu koji će omogućiti da idemo dalje. Takvu saradnju želim i nadam se da ćemo je imati" zaključio je ministar.

Predstavnici UPFBiH na sastanku su ministricom obrazovanja i nauke FBiH Jasnom Duraković

Direktor Udruženja poslodavaca u FBiH Mario Nenadić i sekretar UPFBiH Mersiha Jusić održali su 30. maja 2023. godine sastanak sa ministricom obrazovanja i nauke FBiH Jasnom Duraković. Sastanku je prisustvovala i federalna ministrica turizma i okoliša Nasiha Pozder kao i predstavnici kompanija koji se susreću s problemom oko dobijanja licenci i dozvola u sistemu prirodnog farbanja putem mikroorganizama koje ove kompanije koriste u svom poslovanju.

Direktor Udruženja poslodavaca u FBiH Mario Nenadić upoznao je prisutne o važnosti ovog Udruženja te pozvao na saradnju oko usklađivanja sistema obrazovanja sa potrebama tržišta rada.



"Ono što često naglašavamo, a na čemu možemo zajedno raditi, jeste usklađivanje potreba na tržištu oko zapošljavanja, dualnog obrazovanja, neformalnog obrazovanju, prekvalifikacije. Prespori smo oko tog usklađivanja, dok nam mlada radna snaga odlazi iz BiH. Zajednički možemo raditi na rješavanju ovih problema, a spremni smo ispred poslovne zajednice pomoći i na druge načine" kazao je ovom prilikom direktor Udruženja poslodavaca FBiH.

Predstavnici kompanija upoznali su prisutne sa sistemom prirodnog farbanja putem mikroorganizama, koji ove firme koriste u svom poslovanju, a za što je potrebno ishoditi potrebne dozvole i mišljenja. Federalna ministrica obrazovanja i nauke Jasna Duraković upoznala je sagovornika sa funkcioniranjem Ministarstva, istaknuvši da će sa svojim saradnicima uraditi sve da poboljša rad ovog značajnog ministarstva.

"Želim da unaprijedimo sve što je od koristi za sve nas. U tom kontekstu, radujem se saradnji sa Udruženjem oko implementacije dualnog obrazovanja, s obzirom da je tržište rada promjenjivo i da je to jedan od prioriteta Ministarstva", kazala je Duraković, te dodala da će se interresorno djelovati, zajedno sa Ministarstvom okoliša FBiH, da se što je moguće prije riješe i navedeni problem firmi koji koriste sistemom prirodnog farbanja putem mikroorganizam.

Održan sastanak Ekonomskog i Pravnog savjeta



Kako su u Federaciji Bosne i Hercegovine već duže vrijeme u proceduri Zakon o doprinosima i Zakon o porezu na dohodak, nakon promjene u izvršnoj i zakonodavnoj vlasti, pokrenute se aktivnosti na ovim zakonima te je Udruženje 12. maja 2023. godine organiziralo sastanak Ekonomskog i Pravnog savjeta s ciljem utvrđivanja principa koji će biti zastupani i sadržani u ovim zakonima.

Plan Udruženja je da nakon obavljenog još jednog kruga konsultacija unutar Udruženja, UPFBiH dostavi utvrđene principe Vladi i resornom ministarstvu kako bi kroz budući rad na ovim pitanjima stav Udruženja bio u potpunosti jasan.

Fokus grupe UPFBiH o Zakonu o porezu na dohodak i Zakonu o doprinosima



Odlukom Upravnog odbora Udruženja poslodavaca u FBiH, Pravni i Ekonomski savjet UPFBiH je pripremio draft principa na osnovu kojih bi se trebali pripremati Zakon o porezu na dohodak i Zakon o doprinosima.

S tim u vezi, planirane su tri fokus grupe na kojima će poslodavci dati svoje prijedloge, sugestije, komentare i primjedbe, a u cilju pripreme konačnog teksta koji će Udruženje poslodavaca u FBiH uputiti nadležnim tijelima.

Planirano je da se prva fokus grupa održi u Sarajevu 06. juna, zatim u Mostaru 08. juna, te u Travniku ili Vitezu 12. juna tekuće godine.

Fokus grupe će se organizovati u sklopu projekta "Doprinos organizacija civilnog društva poboljšanju uticaja preduzetništva na socio-ekonomski razvoj BiH – EISE projekat" koji provodi Udruženje poslodavaca u Federaciji Bosne i Hercegovine i Unija poslodavaca RS, a koji finansira Europska unija.

UPFBiH resornim ministarstvima dostavilo usaglašene prioritete aktivnosti za poboljšanje poslovnog ambijenta

Predstavnici Udruženja poslodavaca u Federaciji Bosne i Hercegovine su početkom maja tekuće godine odžali sastanak s premijerom Vlade FBiH i federalnim ministrima.



Na pomenutom sastanku su predstavnici Udruženja poslodavca u Federaciji Bosne i Hercegovine upoznali premijera i ministre sa prioritetskim aktivnostima UPFBiH za poboljšanje poslovnog ambijenta, usaglašenim na Upravnom odboru, te u skladu sa zaključcima sastanka, iste dostavile resornim ministarstvima.

Održan sastanak predstavnika UPFBiH, Obrtničke komore FBiH i Obrtničke komore KS



Na inicijativu Udruženja poslodavaca u FBiH, direktor UPFBiH Mario Nenadić i zamjenik Skupštine UPFBiH i član UO Udruženja poslodavaca KS Igor Baroš, održali su 05. maja 2023. godine sastanak sa predsjednikom Obrtničke komore FBiH Željkom Babićem i predsjednikom Obrtničke komore KS Naserom Idrizagićem.

Sastanak je organizovan u vezi sa aktuelnom situacijom uspostave nove vlasti na svim nivoima u FBiH i zajedničkim pitanjima i problemima sa kojima se susreću poslodavci i obrtnici.

Zaključeno je da su problemi veoma slični u funkcioniranju obrta i privrede općenito, a posebno su aktuelni problemi vezani za opterećenje cijene rada, neodrživa poreska i parafiskalna opterećenja, probleme plaćanja bolovanja, probleme zaštite na radu itd.

Također je zaključeno da će u skladu sa prioritetima utvrđenim od strane upravljačkih struktura UPFBiH i Obrtničke komore FBiH novoformiranoj vladi biti delegirana pitanja za rješavanje problema u privredi. Dogovoreno je da će Udruženje poslodavaca u FBiH i Obrtnička komora FBiH svoju saradnju formalizirati na način da će svojim upravnim odborima predložiti potpisivanje odgovarajućeg memoranduma o saradnji.

Predstavници UPFBiH održali sastanak s direktoricom Forster Rohner Iliđa d.o.o.



Direktor UPFBiH Mario Nenadić i sekretar UPFBiH Mersiha Jusić održali su 22. maja 2023. godine sastanak sa članicom UPFBiH, direktoricom Forster Rohner Iliđa d.o.o. Elmom Memić.

Rohner Iliđa d.o.o. je dio Švicarske Grupacije svjetski poznatog lidera na polju izrade tradicionalnog, finog i inovativnog veza i obrade, izuzetno profinjenog, kvalitetnog tekstilnog proizvoda Forster Rohner AG i broji 217 uposlenih, a Udruženju se obratila s ciljem rješavanja problema oko dobivanja licenci i dozvola u sistemu prirodnog farbanja putem mikroorganizama koja ova kompanija koristi u svom poslovanju.

Naime, u Služenim novinama FBiH, broj 72/22 od 09.09.2022.godine obavljen je "Pravilnik o mjerama sigurnosti i standardima objekata za ograničenu primjenu genetskih modificiranih organizama" po kojem je ova kompanija postupila i na vrijeme podnijela "Zahtjev za za dobivanje ograničene upotrebe genetski modificiranih mikroorganizama u rizičnoj skupili 1". Međutim, iako je po Pravilniku o sadržaju prijave kontrolisanog sistema za ograničenu upotrebu genetski modificiranih organizama propisan rok za odlučivanje po zahtjevu, kompanija do danas nije dobila odobrenje za ograničenu upotrebu GMO u zatvorenom kontrolisanom sistemu, niti potvrdu da su registrovani korisnici GMO u zatvorenom kontrolisanom sistemu od strane Ministarstva obrazovanja i nauke FBiH što je nužno za pokretanje sektora za Colorifix farbanje.

Nedobivanje potvrde mnogo utiče na poslovanje kompanije jer su bili u obavezi prema partnerima i kupcima da počnu s projektom u decembru 2022. godine. Početak ovog projekta znači i jednu novu eru jer bi ova kompanija bila jedini na Balkanu i u BiH koja bi bila registrovana za ovu djelatnost.

Na sastanku je zaključeno da će Udruženje zatražiti sastanak sa ministricom obrazovanja i nauke u FBiH s ciljem što hitnijeg rješavanja ovog problema u korist cjelokupne društvene zajednice.

Upisne politike metodološki razraditi i prilagoditi tržištu rada



Direktor Udruženja poslodavaca u FBiH Mario Nenadić i predsjednik Udruženja poslodavaca Kantona Sarajevo Suad Ećo prisustvovali su 24. maja 2023. godine radno-konsultativnom sastanku na temu upisnih politika koji je organizovao JU Institut za razvoj preduniverzitetskog obrazovanja. Sastanku su prisustvovali predstavnici Udruženja poslodavaca u FBiH, Udruženja poslodavaca KS, Ministarstva za odgoj i obrazovanje Kantona Sarajevo, Zavoda za zapošljavanje Kantona Sarajevo te Privredne komore.

Poslodavci su iskazali nezadovoljstvo što se metodologija istraživanja potreba tržišta rada i usklađivanja obrazovnih politika sa ovim pitanjem prepisuje, te nema inovativnih i neophodnih rješenja. Tržište rada se mijenja, kao i tehnologije, dok je kretanje radne snage u posljednje vrijeme veoma promjenjivo te poslodavci insistiraju na usklađivanju politika i propisa.

Poslodavci su mišljenja da ovo pitanje treba biti praćeno putem odgovarajućih projekata službi za zapošljavanje i u saradnji sa poslovnom zajednicom na godišnjem nivou te da je, prilikom plana za narednu godinu, neophodno raditi kvalitetne procjene i kreirati kvalitetne upisne politike i kvote.

Predsjednik UPKS Suad Ećo je ukazao na potrebu povećanja kvota za upis u zanatske škole te da se deficitarna zanimanja trebaju dodatno stimulisati kroz stipendiranja kako bi se postigla veća zainteresovanost učenika za upis u takve vrste škola.

ESV ZDK održao tematsku sjednicu o trenutnom stanju nezaposlenosti



U sjedištu Vlade Zeničko-dobojskog kantona 02. maja 2023. godine održana je tematska sjednica Ekonomsko-socijalnog vijeća za područje ZDK na temu trenutnog stanja nezaposlenosti, sa posebnim osvrtom na brojčano stanje i strukturu osoba evidentiranih kod JU Služba za zapošljavanje ZDK.

Posebno je problematizirano pitanje svrsishodnosti ostvarivanja prava na zdravstveno osiguranje nezaposlenih osoba putem JU Služba za zapošljavanje ZDK, a generalni zaključak sa održane sjednice je da ESV inicira izmjene propisa koji reguliraju ovu oblast, na način da se pitanje ostvarivanja prava na zdravstveno osiguranje nezaposlenih osoba dodijeli u nadležnost Zavoda zdravstvenog osiguranja.

Ovakva inicijativa u konačnici bi trebala doprinijeti rasterećenju od obaveza JU Služba za zapošljavanje koje se primarno ne odnose na poslove posredovanja u zapošljavanju, odnosno omogućila bi da na evidenciji nezaposlenih osoba budu evidentirani samo aktivni tražioci posla.

Održana tematska sjednica ESV-a ZDK na temu iniciranja izmjena Zakona o zdravstvenom osiguranju



U sjedištu Vlade Zeničko-dobojskog kantona 25.05.2023. godine održana je tematska sjednica Ekonomsko-socijalnog vijeća za područje Zeničko-dobojskog kantona na temu iniciranja izmjena Zakona o zdravstvenom osiguranju, a u smislu osiguranja prava na osnovno zdravstveno osiguranje za nezaposlene osobe na teret Zavoda zdravstvenog osiguranja, čime bi se Službe za zapošljavanje rasteretile obaveze plaćanja zdravstvenog osiguranja nezaposlenih osoba.

Intencija ovakve inicijative je da se na ovaj način osigura da na evidenciji nezaposlenih osoba, budu evidentirani stvarni tražioci posla, budući da je veliki broj trenutno prijavljenih osoba na evidenciji nezaposlenih prijavljeno upravo radi ostvarivanja prava na zdravstveno osiguranje, a ne sa namjerom aktivnog traženja zaposlenja.

Konačan cilj pokrenute inicijative je da se obavezno zdravstveno osiguranje osigura i za one građane koji ne spadaju niti u jednu od skupina osiguranika definisanih Zakonom o zdravstvenom osiguranju.

Direktor UPFBiH prisustvovao obilježavanju 33 godine rada Sindikat državnih službenika i namještenika u FBiH



Direktor Udruženja poslodavaca u FBiH Mario Nenadić prisustvovao je obilježavanju 33 godine rada Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBiH.

Predsjednik Sindikata Samir Kurtović rekao je u obraćanju da je to najveći granski sindikat u BiH sa skoro 14.000 članova koji ima vrlo dobre rezultate i dobru saradnju sa socijalnim partnerima.

- U toku su pripreme izmjena kolektivnog ugovora kako bi popravili status svih zaposlenika javne uprave i doveli ga na zadovoljavajući nivo da se više ne bi dešavalo da napuštaju zemlju zbog niskih primanja - naveo je Kurtović.

Danu sindikata su prisustvovali predstavnici vlasti s različitih nivoa u FBiH, Udruženja poslodavca, advokatskih komora i drugi gosti.

Inicijativa za uspostavljanje institucije biznis ombudsmana u BiH: Održan zajednički sastanak predstavnika privrede i institucija



U okviru Inicijative za uspostavljanje institucije biznis ombudsmana u BiH je 24.05.2023. godine u Sarajevu održan zajednički sastanak predstavnika privredne zajednice i institucija sa različitih nivoa. Ispred Udruženja poslodavaca u FBiH sastanku je prisustvovala pravnik Jasmina Kurspahić. Cilj sastanka je bio da se razgovara o potrebi uspostavljanja institucije koja bi za cilj imala zaštitu privrednika i preduzetnika u BiH i mogućim načinima uspostavljanja iste.

Zajednički zaključak učesnika skupa je da je u Bosni i Hercegovini potrebna zaštita privrednika od nepravilnosti koje nastaju u javnim institucijama. Jedinствен je i zaključak da takva institucija mora biti potpuno nezavisna u svom radu, i da se mora spriječiti bilo kakav politički uticaj na instituciju.

Što se tiče načina osnivanja institucije, njenih nadležnosti, finansiranja i drugih tema, učesnici su imali različite stavove i prijedloge. Institucija može biti osnovana od strane države, može biti organizovana u okviru privrednih komora, a takođe je moguće osnivanje institucije kojom upravlja vijeće sastavljeno od predstavnika vlasti, privredne zajednice i međunarodnih institucija.

Mogući izvori finansiranja institucije su državni budžet, međunarodne organizacije kao i

finansiranje od strane privrednika. Iako postojeće institucije biznis ombudsmana u svijetu svoje usluge privrednicima daju besplatno, te im se mogu obraćati sve kompanije koje posluju u zemlji bez obzira da li su osnovane u toj zemlji ili da li su članice privrednih komora, mišljenje nekih učesnika je i da je moguće da sami privrednici finansiraju jednu ovakvu instituciju. Sa druge strane, neki od učesnika smatraju da instituciju, bar u prvo vrijeme, trebaju finansijski podržati međunarodne organizacije. Takođe, instituciju je hipotetički moguće osnovati na državnom, entitetskom, kantonalnom i nivou Brčko distrikta. Osnivanje na državnom nivou bi omogućilo jednaka prava privrednicima na cijeloj teritoriji BiH, dok bi osnivanje na nižim nivoima dovelo do nejednakih uslova za poslovanje na pojedinim teritorijama u BiH, kakva je situacija u BiH i u drugim oblastima.

Pored ovih, postoje i druga otvorena pitanja koja bi se trebalo definisati u narednom periodu u procesu zagovaranja za uspostavljanje institucije biznis ombudsmana u BiH, jer je to pitanje oko kojeg su se svi učesnici složili – privrednim subjektima u BiH, bez obzira na mjesto i način osnivanja, industriju i polje djelovanja, je potrebna zaštita od nepravilnosti koje nastaju u postupanju javnih institucija.

Sekretar UPFBiH prisustvovala prezentaciji nalaza pripremne faze projekta Posao za sve

Prezentacija nalaza pripremne faze projekta Posao za sve koji podržavaju Evropska unija u Bosni i Hercegovini i Ambasada Švedske u Sarajevu održana je 25. maja u Sarajevu.



Prezentaciji su prisustvovali više od 50 predstavnika institucija i organizacija civilnog društva u Bosni i Hercegovini, a ispred Udruženja poslodavaca u FBiH prisustvovala je sekretar Mersiha Jusić.

Fokus projekta je na unapređenju praksi i kapaciteta institucija tržišta rada da podrže aktivaciju i zapošljavanje najteže zapošljivih osoba, prevashodno mladih, žena iz ruralnih područja, Roma, osoba sa invaliditetom i dugoročno nezaposlenih osoba.

Nova članica UPFBiH - INTERLOGISTIC d.o.o. Sarajevo

INTERLOGISTIC d.o.o. Sarajevo je licencirana logistička firma, u domaćem vlasništvu, koja se bavi sveobuhvatnom uslugom transporta, cargo transporta, špedicije, uvoza, izvoza, i skladištenja robe.



Kompanija pruža kompletnu paletu usluga iz oblasti međunarodne i unutrašnje špedicije, carinskog posredovanja, organizaciju svih vrsta transporta iz bilo koje destinacije u svijetu, skladištenje pošiljki, dostavu i distribuciju robe širom BiH. Interlogistic d.o.o. Sarajevo posjeduje licencirana teretna vozila, a uposlenici su licencirani međunarodni otpremnici, carinski deklaranti, cargo agenti, ili vozači.

Više o kompaniji pročitajte [OVDJE](#).

Nova članica UPFBiH - Kliping BH d.o.o.



Kliping je moderna kompanija sa dugogodišnjom tradicijom u području praćenja medija, medijskih analiza i stručne podrške za sve koji se bave medijima na bilo koji način. S partnerima stvaraju sveobuhvatnu mrežu usluga, potrebnu različitim vrstama organizacija za učinkovito upravljanje medijskim informacijama.

Kliping čine ljudi, nositelji znanja i kreatori budućnosti na području medijskog monitoringa, analiza i planiranja. Prateći razvoj svih vrsta medija i srodnih tehnologija, klijentima omogućuju kompletan pregled i upravljanje informacijama kako bi im olakšali proces donošenja odluka. Kompanija prati najviše standarde kvaliteta, fokusirajući se na korisnost usluga.

Više o kompaniji pročitajte [OVDJE](#).

Nova članica UPFBiH - GS1 BiH

GS1 Bosne i Hercegovine predstavlja zajednicu od više od 1700 članica iz Bosne i Hercegovine koje se bave proizvodnjom, prodajom, prehrambenim uslugama, zdravstvenom zaštitom itd. GS1 BiH je jedna od 115 neovisnih, neprofitnih GS1 organizacija koje posluju u 150 zemalja iz čitavog svijeta.



GS1 BiH pruža pomoć kompanijama i preduzećima koje su uključene u proizvodnju, transport i trgovinu robama kako bi automatizovali i standardizovali svoje procese u lancu snabdijevanja koristeći zajednički jezik GS1 globalnih standarda. Iste efikasnosti donose i u lanac snabdijevanja u zdravstvu – sve do unaprijedene sigurnosti pacijenata.

Više o GS1 BiH pročitajte [OVDJE](#).

Nova članica UPFBiH - Metal export upravitelj d.o.o.



Metal Export Upravitelj je u vlasništvu firme Metal Export d.o.o., građevinske firme koja se bavi elektro i vodo-instalacijama. Iza sebe ima dugogodišnje iskustvo i mnoge kompleksne objekte poput Alta Shopping Centar, Robot Shopping centre,


Porodilište Jezero i mnoge druge.

Više o kompaniji pročitajte [OVDJE](#).

Nova članica UPFBiH - Proving d.o.o.

Društvo "PROVING" d.o.o. Sarajevo osnovano je 1989. godine od strane grupe entuzijasta koji su radili u oblasti zaštite, kao prvo privatno društvo za obavljanje poslova zaštite od požara u bivšoj Jugoslaviji. Početkom svog rada društvo se počelo baviti izradom planova zaštite od požara, pravilnika, elaborata o zonama opasnosti, projektovanjem objekata specifičnih sa aspekta zaštite od požara, pregledom i ispitivanjem elektro instalacija te pregledom i servisiranjem opreme za gašenje požara.

Obzirom na potrebe tržišta u drugoj polovini 1998. godine društvo PROVING osniva svoju firmu «Proving inženjering» d.o.o. Sarajevo koja se počinje baviti proizvodnjom montažom, prodajom i servisom opreme i uređaja za gašenje i dojavu požara.



Danas je "Proving" respektabilna firma u oblasti zaštite od požara i zaštite na radu, koja izuzetno puno ulaže u unaprijeđenje svog poslovanja, edukaciju uposlenika te nastoji biti u skladu sa najmodernijim trendovima, a dokaz tome je i posjedovanje certifikata ISO 9001:2008.

Društvo raspolaže sa najsavremenijom opremom za ispitivanja u oblasti zaštite od požara i zaštite na radu i kadrovima sa velikim iskustvom.

U cilju unapređenja svoje tehnologije i stručnog osposobljavanja društvo saraduje sa preduzećima i institutima koji se bave ovom djelatnošću iz cijele Europe i aktivno učestvuje u većini svjetskih skupova ove oblasti, prateći svjetske trendove, brižljivo čuvajući kvalitet kao svoje glavno obilježje.

Više o kompaniji pročitajte [OVDJE](#).



UDRUŽENJE POSLODAVACA

**UDRUŽENJE POSLODAVACA FBiH
MARŠALA TITA 6, 71 000 SARAJEVO**

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba